



REPUBLIKA E SHQIPËRISË

bmp BORDI
MBIKËQYRJES
PUBLIKE

amf
AUTORITETI I MBIKËQYRJES FINANCIARE

BORDI I MBIKËQYRJES PUBLIKE

AUTORITETI I MBIKËQYRJES FINANCIARE

Nr. 229 Prot.

Nr. 3024 Prot.

MARRËVESHJE

PËR

BASHKËPUNIM DHE SHKËMBIM INFORMACIONI NDËRMJET

BORDIT TË MBIKËQYRJES PUBLIKE

DHE

AUTORITETIT TË MBIKËQYRJES FINANCIARE

Tiranë, më 25/10/2024

Bordi i Mbikëqyrjes Publike (në vijim BMP) është një institucion me statusin e një autoriteti rregullator të pavarur, i cili vepron në bazë të ligjit nr. 10091, datë 05.03.2009 “Për auditimin ligjor, organizimin e profesionit të audituesit ligjor dhe të kontabilistit të miratuar”, i ndryshuar

Autoriteti i Mbikëqyrjes Financiare (në vijim AMF) është institucion publik, i pavarur nga ekzekutivi, përgjegjës për rregullimin dhe mbikëqyrjen e sistemit financiar jo bankar dhe operatorëve që ushtrojnë aktivitetin e tyre në këtë sektor, si dhe vepron në bazë dhe zbatim të ligjit nr. 9572, datë 03.07.2006 “Për Autoritetin e Mbikëqyrjes Financiare”, i ndryshuar.

Bordi i Mbikëqyrjes Publike dhe Autoriteti i Mbikëqyrjes Financiare, këtu e në vijim referuar si “palët”.

BIEN DAKORD:

Të lidhin këtë marrëveshje si më poshtë:

Neni 1

QËLLIMI I MARRËVESHJES

Qëllimi i kësaj Marrëveshje është:

1. Shkëmbimi i informacionit lidhur me zbatimin e Kodit të Etikës dhe Standardeve Ndërkombëtare të Auditimit dhe standardet e tjera nga audituesit ligjorë dhe shoqëritë e auditimit;
2. Shkëmbimi i informacionit lidhur me rezultatet e procesit të kontrollit për sigurimin e cilësisë të audituesit ligjorë/ shoqërive të auditimit, i cili realizohet nga Bordi i Mbikëqyrjes Publike;
3. Ngritja e sistemeve të informacionit dhe dokumentacionit, të cilat i përgjigjen misionit publik të BMP, nëpërmjet grumbullimit dhe përpunimit të të dhënave të ofruar nga AMF mbi veprimtarinë e audituesve ligjorë dhe kontabilistëve të miratuar, ku ata janë të angazhuar me auditime, ekspertiza, programe ose dhënie opinionit
4. Përmirësimi i nivelit të sigurisë nga auditimet ligjore apo niveli i cilësisë nga shërbimet kontabël në kushtet e një mjedisi transparent, të kontrolluar dhe të kujdesshëm, në përputhje të plotë me interesat e publikut, duke respektuar njëkohësisht profesionalizmin e audituesit ligjor apo kontabilistit të miratuar;
5. Bashkëpunimi në fushën e legjislacionit, nëpërmjet konsultimit dy palësh të akteve ligjore si dhe nëpërmjet propozimeve për ndryshim dhe rishikim të akteve rregullatore në përputhje me fushën e veprimtarisë së institucioneve nënshkruese.

Neni 2

BAZA LIGJORE

Kjo marrëveshje është e bazuar në ligjin nr. 10091, datë 05.03.2009 “Për auditimin ligjor, organizimin e profesionit të audituesit ligjor dhe të kontabilistit të miratuar”, i ndryshuar, ligjin nr. 9572, datë 03.07.2006 “Për Autoritetin e Mbikëqyrjes Financiare”, i ndryshuar, dhe aktet e tjera nënligjore në zbatim të tyre.

Neni 3

PARIMET E MARRËVESHJES

Bashkëpunimi i palëve në kuadër të përmbushjes së qëllimit të kësaj marrëveshje do të udhëhiqet nga parimet e mëposhtme:

1. Përcaktimet e kësaj marrëveshje nuk kanë për qëllim të tejkalojnë parashikimet ligjore mbi bazë dhe për zbatim të së cilave lidhet kjo marrëveshje;
2. Përcaktimet e kësaj marrëveshjeje nuk mund të cenojnë të drejtat, detyrat dhe përgjegjësitë e secilit prej institucioneve që rrjedhin nga legjislacioni në fuqi, në bazë të të cilit këto institucione janë krijuar dhe funksionojnë;
3. Shkëmbimi i informacionit dhe bashkëpunimi do të bëhet vetëm nëpërmjet mënyrave të lejuara nga dispozitat ligjore në fuqi;
4. Institucionet njohin kërkesën për shkëmbimin e informacionit ose bashkëpunimit, në bashkërendim me ligjet përkatëse ose kërkesat rregullatore. Kërkesa mund të mos plotësohet kur:
 - a) informacioni i kërkuar është në kundërshtim me ndonjë akt ligjor apo nënligjor që rregullon ruajtjen e konfidencialitetit;
 - b) kërkesa nuk është bërë në përputhje me dispozitat e parashikuara në këtë marrëveshje;
5. Bashkëpunimi dhe shkëmbimi i informacionit nëpërmjet komunikimit dhe takimeve, në mënyrë që secila palë të përmbushë përgjegjësitë e saj ligjore;
6. Përcaktimi i saktë i përgjegjësive, duke u mbështetur në kuadrin ligjor ekzistues, duke siguruar kështu rritjen e efikasitetit dhe të përgjegjshmërisë së palëve për veprimet e kryera, në raport me çështjet që trajtohen.

Neni 4

PROCEDURA PËR SHKËMBIMIN E INFORMACIONIT

1. Në përputhje me legjislacionin në fuqi, palët do të bashkëpunojnë për të mbledhur dhe

- analizuar informacionin që disponojnë dhe vënien në dispozicion të tij zyrtarisht me shkrim.
2. Informacioni ose dokumentacioni i marrë nga palët është konfidencial dhe nuk mund t'i shpërndahet palëve të treta, pa miratimin paraprak me shkrim të palëve.
 3. Palët nuk do të lejojnë përdorimin apo dhënien e çdo informacioni ose dokumenti të marrë nga palët përkatëse për qëllime të tjera nga ato të përmendura në këtë marrëveshje bashkëpunimi, përveçse kur në ligj parashikohet ndryshe.
 4. Për të lehtësuar komunikimin dhe për të siguruar vazhdimësinë e bashkëpunimit ndërmjet palëve, çdo palë cakton personin e kontaktit të përcaktuar në nenin 7, për komunikimet sipas kësaj marrëveshjeje.
 5. Pala kërkuese do të bëjë kërkesën për informacion me shkrim drejtuar personit të kontaktit të palës tjetër.
 6. Kërkesa do të përfshijë:
 - a) një përshkrim të objektit të kërkesës dhe qëllimit për të cilin pala kërkuese kërkon informacionin;
 - b) një përshkrim të dokumentacionit ose informacionit të kërkuar;
 - c) çdo informacion që disponon pala kërkuese dhe që mund të ndihmojë palën të cilës i kërkohet informacioni për identifikimin e personave, organeve ose subjekteve që besohet se zotërojnë informacionin e kërkuar, ose vendet ku pala e kërkuar mund të marrë një informacion të tillë;
 - d) dispozitat ligjore në lidhje me çështjen që është objekt i kërkesës.
 7. Në rrethana urgjente, palës së cilës i kërkohet informacioni pranon një kërkesë për informacion dhe e përshpejton përgjigjen, për aq sa është e mundur, me procedura të përmbledhura ose nëpërmjet komunikimit elektronik. Këto komunikime urgjente duhet të konfirmohen me shkrim nga personat e kontaktit të përcaktuar në nenin 7 brenda 10 ditësh pune.

Neni 5

EKZEKUTIMI I KËRKESËS

1. Kur pala që i kërkohet informacioni konfirmon që kërkesa është në përputhje me këtë marrëveshje bashkëpunimi si dhe me kuadrin rregullator që rregullojnë fushat përkatëse, kjo e fundit:
 - a) jep informacionin sipas kërkesës;
 - b) merr informacion, duke përfshirë deklaratat dhe dëshmi, si dhe mbledh dokumentacionin në përputhje me legjislacionin dhe procedurat nën juridiksionin e palëve.
2. Çdo kërkesë do të vlerësohet rast pas rasti nga pala e kërkuar për të përcaktuar nëse informacioni mund të sigurohet sipas kushteve të kësaj marrëveshje bashkëpunimi.

Neni 6

TË DREJTAT E PALËS SË KËRKUAR

1. Pala që i kërkohet informacioni mund të refuzojë kërkesën për informacion sipas marrëveshjes të bashkëpunimit kur:
 - a) përmbushja e kërkesës është në kundërshtim me aktet ligjore e nën ligjore të palës që i kërkohet informacioni;
 - b) kërkesa nuk është në përputhje me dispozitat e kësaj marrëveshje bashkëpunimi;
 - c) shkelet ose cënohet interesi publik.
2. Kur pala që i kërkohet informacioni, refuzon kërkesën për informacion dhe bashkëpunim, ose kur ky informacion nuk është i disponueshëm sipas akteve ligjore e nën ligjore, pala arsyeton mos dhënien e informacionit.

Neni 7

PERSONAT E KONTAKTIT

1. Për të lehtësuar bashkëpunimin dhe shkëmbimin e informacionit sipas kësaj marrëveshje, palët përcaktojnë personat e kontaktit, dhe të gjitha komunikimet ndërmjet palëve do të realizohen nëpërmjet tyre, përveç rasteve kur është rënë dakord ndryshe.
2. Personat e kontaktit do të jenë si më poshtë:

BMP - përfaqësohet nga Erjola Vejzati, Drejtor Ekzekutiv.

AMF - përfaqësohet nga Znj. Anxhela Dervishi, Drejtor i Drejtorisë së Mbikëqyrjes së Tregut të Fondeve dhe Znj. Marsela Vaska, Drejtor i Drejtorisë së Mbikëqyrjes së Tregut të Sigurimeve.

Neni 8

RISHIKIMI I MARRËVESHJES

Palët rishikojnë vazhdimisht zbatimin e kësaj Marrëveshje dhe e konsultojnë atë me synimin e përmirësimit dhe të zgjidhjes së problemeve të ndryshme që mund të dalin.

Neni 9

DISPOZITA PËRFUNDIMTARE

1. Ngarkohen BMP dhe AMF me strukturat e tyre përbërëse për zbatimin e detyrave të parashikuara në këtë Marrëveshje.
2. Çdo rregullim ose ndryshim, sipas nenit 8 të kësaj Marrëveshje, bëhet vetëm nëpërmjet pëlqimit reciprok të palëve dhe me shkrim.

3. Palët duhet t'i përgjigjen propozimeve reciproke për rregullime ose ndryshime, jo më vonë se 30 ditë pas marrjes së këtij propozimi.
4. Çdo mosmarrëveshje në lidhje me interpretimin dhe zbatimin e kësaj marrëveshje zgjidhet me mirëkuptim midis palëve.
5. Marrëveshja mund të përfundojë me njoftimin me shkrim të secilës palë, një muaj pas këtij njoftimi.

Neni 10 PUBLIKIMI

Palët bien dakord që kjo Marrëveshje Bashkëpunimi të publikohet në faqet zyrtare të secilës palë.

Neni 11 HYRJA NË FUQI

Kjo Marrëveshje hyn në fuqi në datën e nënshkrimit nga palët dhe do të jetë në fuqi për një periudhë kohe të pacaktuar.

Kjo marrëveshje hartohet në katër kopje dhe secila nga palët mban dy kopje në original.

Kjo marrëveshje përbëhet nga 11 (njëmbëdhjetë) nene,.

Me hyrjen në fuqi të kësaj marrëveshje, marrëveshja e bashkëpunimit e datës 18.10.2010, shfuqizohet.

Nënshkruar sot, më datë 25/10/2024, në Tiranë.

BORDI I MBIKËQYRJES PUBLIKE

KRYETAR



Dritan FENO

AUTORITETI I MBIKËQYRJES FINANCIARE

**DREJTOR I PËRGJITHSHËM
EKZEKUTIV**



Mimoza KAÇI